

摘藻堂四庫全書薈要

史部

欽定四庫全書薈要

史部

宋史卷二百四十八

六至



詳校官編修臣王天祿

欽定四庫全書薈要卷五千八百七十四

史部

宋史卷二百四十六

元中書右丞相總裁托克托等修

傳第五

宗室三

吳王顥

益王顥

吳王佖

燕王倖

楚王似

獻愍太子茂

鄆王楷

肅王樞

景王杞

濟王栩

徐王棣

沂王櫟

和王栻

信王榛

太子諶

弟訓

元懿太子粦

信王璩

莊文太子愔

魏王愷

景獻太子詢

鎮王竑

英宗四子長神宗次吳榮王顥次潤王顏次益端獻王

顏皆宣仁聖烈高皇后出也顏早亡徽宗賜名追封

吳榮王顥字仲明初名仲紉自右內率府副率為和州

防禦使封安樂郡公轉明州觀察使進祁國公治平元

年加檢校太傅保寧軍節度使同中書門下平章事封東陽郡王三年出閣神宗立進封昌王官制行冊拜司空徙王雍哲宗嗣位加太保換成德橫海二鎮徙封揚王賜贊拜不名五日一謁禁中帝致恭如家人禮神宗祔廟拜太傅移鎮京兆鳳翔自熙寧以來顯屢請居外章上輒卻至元祐初乃賜咸宜坊第一區榜曰親賢與弟願對邸車駕偕三宮臨幸留宴終日拜太尉諸子皆命賜官制曰先皇帝篤兄弟之好以恩勝義不許二叔

出居於外蓋武王待周公之意太皇太后嚴朝廷之禮以義制恩始從其請出就外宅得孔子遠其子之意二聖不同同歸於道皆可以為萬世法朕承侍兩宮按行新第顧瞻懷思潸然出涕昔漢明帝問東平王在家何以為樂王言為善最樂帝大其言因送列侯印十九枚諸子五歲以上悉佩之著之簡策天下不以為私今王諸子性於忠孝漸於禮義自勝衣以上頽然皆有成人之風朕甚嘉之其各進一官以助其為善之樂尚勉之

哉母忝父祖以為邦家先徙封徐王詔書不名宣仁有疾顥旦旦入問因亦被病宣仁祔廟拜太師徙王冀賜入朝不趨改淮南荆南節度使徙封楚王病益篤帝親挾醫視診令晝夜具起居狀聞小愈則喜既而薨年四十七帝即臨哭輟朝五日成服苑中贈尚書令兼中書令揚荆冀三州牧燕王謚曰榮陪葬永厚陵徽宗即位改封吳王顥天資穎異尤嗜學始就外傳每一經終即遺講讀官以器幣服馬工飛白善射好圖書博求善本

神宗嘉其志尚每得異書亟馳使以示嘗賜方團玉帶
俾服而朝顥辭乃為製玉魚以別之是後親王遂踵為
故實初居英宗喪丐解官終制以厭於至尊不克遂服
慈聖光獻太后之服易月當除顥曰身為孫而情文缺
然若是可乎請如心喪禮須上禫除即吉詔可子孝騫
嗣終寧國軍節度使晉康郡王孝錫終嘉州團練使贈
永國公

益端獻王頤初名仲格封大寧郡公進鄆國公樂安郡

王嘉王所歷官賜略與兄顥同更武勝山南西保信保
靜武昌武安武寧鎮海成德荆南十節度徙王曹荆位
至太尉元祐三年七月薨年三十三贈太師尚書令荆
徐二州牧魏王謚端獻徽宗改封益王顥端重明粹少
好學長博通羣書工飛白篆籀賓接官僚歲滿當去輒
奏留久者至十餘年頗好醫書手著普惠集効方且儲
藥以救病者子九人孝哲右驍衛將軍早亡孝奕彰化
軍節度觀察留後贈司空平原郡王孝參奉國軍節度

使改寧武武勝封豫章郡王孝永邢州觀察使贈司空
廣陵郡王孝詒孝隲孝悅孝頴孝愿皆至節度使

神宗十四子長成王侑次惠王僅次唐哀獻王俊次褒
王伸次冀王僖次哲宗次豫悼惠王侼次徐冲惠王僖
次吳榮穆王佖次儀王偉次徽宗次燕王俣次楚榮憲
王似次越王偲八王皆早薨侑僅伸偉徽宗賜名追封
俊僖侼僖徽宗改封

吳榮穆王佖帝第九子初授山南東道節度使封儀國

公哲宗立加開府儀同三司大寧郡王進申王拜司空
帝崩似於諸弟為最長有目疾不得立徽宗嗣位以帝
兄拜太傅加殊禮旋拜太師歷京兆真定尹荆揚太原
興元牧徙國陳崇寧五年薨輟視朝七日贈尚書令兼
中書令徐州牧燕王謚榮穆又加贈侍中改封吳王子
有奕武信軍節度使和義郡王

燕王俣帝第十子越王偲帝第十二子母曰林婕妤俣
初授武定軍節度使檢校太尉封成國公偲初授武成

軍節度使檢校太尉祁國公哲宗朝俟加開府儀同三司封咸寧郡王偲加開府儀同三司封永寧郡王是後累換節鉞歷任尹牧俟進封萃王偲封睦王徽宗朝俱歷太保太傅俟進封衛王魏王燕王偲進封定王鄧王越王靖康元年同遷太師俟授河東劔南西川節度使成都牧偲授永興成德軍節度使雍州真定牧二年上皇幸青城父老邀之不及道遇二王哭曰願與王俱死徐秉哲捕為首者戮之益兵衛送二王於金營北行至

慶源境上俟乏食薨偲至韓州而薨紹興初有崔紹祖者至壽春府稱越王次子受上皇蠟詔為天下兵馬大元帥興師恢復鎮撫使趙霖以聞召赴行在事敗送臺獄伏罪斬於越州市

楚榮憲王似帝第十三子初為集慶軍節度使和國公進普寧郡王元符元年出閣封簡王似於哲宗為母弟哲宗崩皇太后議所立宰相章惇以似對后曰均是神宗子何必然乃立端王徽宗定位加司徒改鎮武昌武

成徙封蔡拜太保移鎮保平鎮安又改鳳翔雄武以王
府史語言指斥送大理寺驗治似上表待罪左司諫江
公望上疏以為親隙不可開開則言可離貳疑迹不可
顯顯則事難磨滅陛下之得天下也章惇嘗持異議已
有隙迹矣蔡王出於無心年尚幼小未達禍亂之萌恬
不以為恤陛下一切包容已開之隙復塗已顯之迹復
泯矣恩意渥縟懽然不失兄弟之情若以曖昧無根之
語加諸至親骨肉之間則有魏文相煎太急之譏而忘

大舜親愛之道豈治世之美事邪臣願陛下密詔有司
凡無根之言勿形案牘倘有瑕可指一入胸次則終身
不忘迹不可泯隙不可塗則骨肉離矣一有浸淫旁及
蔡王之語不識陛下將何以處之陛下何顏見神考於
太廟乎疏入公望罷知淮陽軍徽宗雖出公望然頗思
其言止治其左右崇寧中徙鎮荆南武寧崇寧二年薨
贈太師尚書令兼中書令冀州牧韓王改封楚王謚榮
憲子有恭定國軍節度使永寧郡王

哲宗一子獻愍太子茂昭懷劉皇后為賢妃時所生帝
未有子而中宮虛位后因是得立然纔三月而夭追封
越王謚冲獻崇寧元年改謚獻愍后之立也鄒浩凡三
上疏諫隨削其藁至是或謂浩有殺卓氏而奪其子欺
人可也詎可以欺天乎之語徽宗昭暴其事復竄浩昭
州而峻茂典冊后上表謝然浩蓋無是言也

徽宗三十一子長欽宗次堯王桎次鄆王楷次荆王楫
次肅王樞次景王杞次濟王栩次益王棫次高宗次邠

王材次祁王模次莘王植次儀王朴次徐王棣次沂王
撝次鄆王拱次和王栻次信王榛次漢王椿次安康郡
王握次廣平郡王捷次陳國公機次相國公榘次瀛國
公樾次建安郡王模次嘉國公椅次溫國公棟次英國
公榘次儀國公桐次昌國公柄次潤國公樅次榘材拱
椿機六王早薨

鄆王楷帝第三子初名煥始封魏國公進高密郡王嘉
王歷奉寧鎮安鎮東武寧保平荆南寧江劔南西川鎮

南河東寧海十一節度使政和八年廷策進士唱名第一母王妃方有寵遂超拜太傅改王鄆仍提舉皇城司出入禁省不復限朝暮於外第作飛橋複道以通往來北伐之役且將以為元帥會白溝失利而止欽宗立改鎮鳳翔彰德軍靖康初與諸王皆北遷

肅王樞帝第五子初封吳國公進建安郡王肅王歷節度六鎮靖康初金人圍京城要帝子弟為質且求輸兩河於是遣宰臣張邦昌從樞幹里雅布軍為金人所留

約俟割地畢遣還而挾以北去

景王杞初授武安軍節度使檢校太尉封冀國公大觀二年改授山南東道節度使加開府儀同三司封文安郡王政和中授檢校太保尋遷太保改授護國武昌軍節度使追封景王靖康元年授荆南鎮東軍節度使遷太傅二年遣詣金營充賀正旦使既歸又從上幸青城及上皇出郊杞日侍左右衣不解帶食不食肉上皇製發願文述祈天請命之意以授杞杞頓首泣及北行鬚

髮盡白

濟王栩初授鎮洮軍節度使檢校太尉封魯國公大觀
二年改授彰武軍節度使加開府儀同三司封安康郡
王政和中授檢校太保改荆南清海軍節度使進封濟
王靖康元年授護國寧海軍節度使遷太傅同景王杞
為賀金人正旦使既還又與何臬為請命使金帥給栩
曰自古有南即有北不可相無今所欲割地而已栩回
以白上且言金帥請與上皇相見上曰豈可使上皇蒙

塵遂自出以棚從行及索諸王家屬棚夫人曹氏避難
他出徐秉哲捕而拘之遂同北去

徐王棣初授鎮江軍節度使檢校太尉封徐國公政和
中授檢校太保宣和中改鎮南軍節度使加開府儀同
三司封高平郡王尋改山南東道河陽三城節度使進
封徐王後從淵聖北去紹興二年有萬州李勃者偽稱
祁王內侍楊公謹與言徐王起居狀勃遂改稱徐王宣
撫使張浚遣赴行在上命王府故吏驗視言非真詔送

大理情得棄市

沂王曄初授橫海軍節度使檢校太尉冀國公政和中授檢校太保宣和中改劍南西川節度使加開府儀同三司封河間郡王尋改劍南東川威武軍節度使遷太保進封沂王後從淵聖出郊至北方與駙馬劉彥文告上皇左右謀變金遣人按問上皇遣莘王植駙馬蔡絳等對辯凡三日曄彥文氣折金人誅之

和王栻初授靜江軍節度使檢校太尉廣國公三年授

檢校太保尋改定武軍節度使加開府儀同三司封南
康郡王靖康元年授瀛海安化軍節度使檢校太傅追
封和王後從淵聖出郊有遺女一人高宗朝封樂平縣
主出適杜安石命太宗正司主婚

信王榛初授建雄軍節度使檢校太尉封福國公三年
授檢校太保宣和末改安遠軍節度使加開府儀同三
司封平陽郡王靖康元年授慶陽昭化軍節度使遷檢
校太傅進封信王後從淵聖出郊北行至慶源亡匿真

定境中時馬廣與趙邦傑聚兵保五馬山砦陰迎榛歸奉以為主兩河遺民間風響應榛遣廣詣行在奏之其略曰邦傑與廣忠義之心堅若金石臣自陷敵中頗知其虛實敵今稍墮皆懷歸心且累敗於西夏而契丹亦出攻之今山西諸砦鄉兵約十餘萬力與敵抗但皆苦窘兼闕戎器臣多方存恤惟望朝廷遣兵來援不然久之恐反為敵用臣於陛下以禮言則君臣以義言則兄弟其憂國念親之心無異願委臣總大軍與諸砦鄉兵

約日大舉決見成功廣既至黃潛善汪伯彥疑其非真
上識榛手書遂除河外兵馬都元帥潛善伯彥終疑之
廣將行密授朝旨使幾察榛復令廣聽諸路節制廣知
事不成遂留於大名府不進會有言榛將渡河入京朝
廷因詔擇日還京以伐其謀金人恐廣以援兵至急發
兵攻諸砦斷其汲道諸砦遂陷榛亡不知所在或曰後
與上皇同居五國城紹興元年鄧州有楊其姓者聚千
餘人自稱信王鎮撫使翟興覺詐遣將斬之以聞

欽宗皇太子諱朱皇后子也政和七年生為嫡皇孫祖宗以來所未有徽宗喜蔡京奏除檢校少保常德軍節度使封宗國公從之會王黼得政謀傾京言其以東宮比人主遂降為高州防禦使靖康元年遷檢校少保昭慶軍節度使大寧郡王尋進檢校少傅寧國軍節度使四月詔立為皇太子二年上幸青城命樞密院同知孫傅兼太子少傅吏部侍郎謝克家兼太子賓客輔太子監國稱制行事未幾金人請二帝諭太子出城統制吳革

力請留欲以所募士微服衛太子潰圍以出傳不許乃謀匿民間別求狀類太子者并宦者二人殺之送金人給以宦者竊太子欲投獻都人爭之併傷太子遲疑不決者五日吳开莫儔督脅甚急范瓊恐變生以危言警衛士遂擁太子與皇后共車以出百官軍吏奔隨號哭太學諸生擁拜車前太子呼云百姓救我哭聲震天已而北去弟訓

訓乃北地所生有碭山人留遇僧者金人見之曰全似

趙家少帝遇僧竊喜紹興十年三京路通詔求宗室遇
僧自言少帝第二子守臣遣赴行在過泗州州官孫守
信疑之白其守請於朝閤門言淵聖無第二子乃詔守
信劾治遇僧伏罪黥隸瓊州後有自北至者曰淵聖小
大王訓見居五國城

元懿太子諱粦高宗子也母潘賢妃建炎元年六月生
於南京拜檢校少保集慶軍節度使封魏國公金人侵
淮南帝幸臨安會苗傅劉正彥作亂逼帝禪位於粦改

元明受既而傅等伏誅帝復位乃以粵為皇太子從幸
建康太子立屬疾宮人誤蹴地上金鑪有聲太子驚悸
疾轉劇薨謚元懿

信王璩字潤夫初名伯玖藝祖七世孫秉義郎子彥之
子也生而聰慧初伯琮以宗子被選入宮高宗命鞠于
婕妤張氏吳才人亦請於帝遂以伯玖命才人母之賜
名璩除和州防禦使時生七歲矣伯琮以建國公就傅
璩獨居禁中俄拜節度使封吳國公宰執趙鼎劉大中

王庶等堅持之命不果行會秦檜專政遂除保大軍節

度使封崇國公尋詔赴資善堂聽讀紹興十五年加檢

校少保進封思平郡王出就外第時伯琮已封普安郡

王璩官屬禮制相等夷號東西府踰年改武昌軍節度

使二十二年子彥卒璩去官持服終喪還舊官顯仁太

后崩普安郡王始立為皇太子璩因加恩稱皇姪名位

始定遷開府儀同三司判大宗正事置司紹興府孝宗

即位璩表請入賀許之特授少保改靜江軍節度使頃

之省紹興府宗正事改判西外宗正司璩累章乞閑改
醴泉觀使淳熙中除少傅高宗崩奔赴得疾踰年而薨
年五十九追封信王累贈太保太師始璩之入宮也儲
位未定者垂三十年中外頗以為疑孝宗既立天性友
愛璩入朝屢召宴內殿呼以官不名也賜予無算子四
人師淳歷忠州團練使永州防禦使師灝師澹師路並
補武翼大夫孫希楫特補保義郎

莊文太子諱愔孝宗嫡長子也母郭皇后初名愉補右

內率府副率尋賜名愔除右監門衛大將軍榮州刺史
孝宗為皇子時愔拜蘄州防禦使及受禪除少保永興
軍節度使封鄧王故事皇子出閣封王兼兩鎮然後加
司空愔自防禦使躡拜少保章異數也乾道元年立為
皇太子冊廣國夫人錢氏為妃詔增東宮從衛太子謙
讓及奏捐月給雜物從之三年秋太子病暍醫誤投藥
病劇上皇與帝親視疾為赦天下越三日薨年二十四
謚莊文太子賢厚上皇與帝皆愛之帝從禮官議服期

以日易月文武百官服衰服一日而除東宮臣僚齊衰三月臨七日而除比葬帝再至東宮命宰臣奉謚冊大小祥皆以執政官行禮子挺錢氏所生也甫晬除福州觀察使封榮國公乾道九年卒贈武當軍節度使追封豫國公寧宗時命宗子希璫為太子後希璫藝祖九世孫也賜名楮補右千牛衛將軍置教授于府開禧二年除忠州防禦使嘉定八年更名思正

魏惠憲王諱愷莊文同母弟也初補右內率府副率轉

右監門衛大將軍貴州團練使孝宗受禪拜雄武軍節度使開府儀同三司封慶王莊文太子薨愷次當立帝意未決既而以恭王英武類已竟立之加愷雄武保寧軍節度使追封魏王判寧國府妻華國夫人韋氏特封韓魏兩國夫人以示優禮賜黃金三千兩白金一萬兩命宰執設祖于玉津園王登車顧謂虞允文曰更望相公保全比至鎮奏朝天申節許之府長史上言欲與司馬分治郡俾王受成愷奏曰臣被命判府今專委長史

司馬是處臣無用之地況一郡置三判府臣恐吏民紛
競不一徒見其擾長史司馬宜主錢穀訟牒俾擬呈臣
臣依而判之庶上下安事益易治又請增士人貢額朝
廷悉從之愷究心民事築圩田之隕圯者帝手詔嘉勞
之淳熙元年徙判明州輟屬邑田租以贍學得兩岐麥
圖以獻帝復賜手詔曰汝勸課藝植農不游惰宜獲瑞
麥之應加愷荆南集慶軍節度使行江陵尹尋改永興
成德軍節度使揚州牧七年薨于明州年三十五帝素

服發哀於別殿贈淮南武寧軍節度使揚州牧兼徐州牧謚惠寧王性寬慈上皇雅愛之雖以宗社大計出王於外然心每念之賜賚不絕計聞帝泣然曰向所以越次建儲者正為此子福氣差薄耳治二郡有仁聲薨之日四明父老乞建祠立碑以紀遺愛子二人攄早卒柄生於明州母卜氏信安郡夫人王薨還居行在柄性早慧帝愛之將內禪升耀州觀察使封嘉國公慶元間封吳興郡王領昭慶軍節度使開禧三年薨贈太保封沂

王謚靖惠子垓三歲而夭詔立宗室希瞿子為其後賜名均領右千牛衛將軍置教授于府尋加福州觀察使後更名貴和即鎮王竝也

景獻太子諱詢燕懿王後藝祖十一世孫也初名與愿寧宗既失究王從宰執京鏜等請取與愿養于宮中年六歲賜名曦除福州觀察使嘉泰二年拜威武軍節度使封衛國公聽讀資善堂開禧元年時邊事益急金人請誅首謀用兵者曦用翊善史彌遠計奏韓侂冑輕起

兵端上危宗社宜賜黜罷以安邊境從之曦立為皇太子拜開府儀同三司封榮王更名禱詔御朝太子侍立宰執日赴資善堂會議尋用天禧故事宰輔大臣並兼師傅賓客太子出居東宮更名詢嘉定十三年薨年二十九謚景獻

鎮王竑希瞿之子也初沂靖惠王薨無嗣以竑為之後賜名均尋改賜名貴和太子詢薨廼立貴和為皇子賜名竑授寧武軍節度使封祁國公嘉定十五年五月加

檢校少保封齊國公十七年六月辛未竑生子詔告天
地宗廟社稷宮觀八月癸未賜竑子名銓授左千牛衛
大將軍丁亥銓薨贈復州防禦使追封永寧侯竑上表
稱謝竑好鼓琴丞相史彌遠買美人善鼓琴者納諸御
而厚廩其家使美人睨竑動息必以告美人知書慧黠
竑嬖之宮壁有輿地圖竑指瓊厓曰吾他日得志置史
彌遠於此又嘗呼彌遠為新恩以他日非新州則恩州
也彌遠聞之嘗因七月七日進乞巧奇玩以覘之竑乘

酒碎於地彌遠大懼日夕思以處竝而竝不知也時沂王猶未有後方選宗室希璠子昀繼之一日彌遠為其父飯僧淨慈寺獨與國子學錄鄭清之登慧日閣屏人語曰皇子不堪負荷聞後沂邸者甚賢今欲擇講官君其善訓迪之事成彌遠之坐即君坐也然言出於彌遠之口入於君之耳若一語洩者吾與君皆族矣清之拱手曰不敢乃以清之兼魏忠憲王府教授清之日教昀為文又購高宗書俾習焉清之上謁彌遠即以昀詩文

翰墨以示彌遠譽之不容口彌遠嘗問清之吾聞其賢

已熟大要竟何如清之曰其人之賢更僕不能數然一言以斷之曰不凡彌遠領之再三策立之意益堅清之始以小官兼教授其後累遷兼如故寧宗崩彌遠始遣清之往告昀以將立之之意再三言之昀默然不應最後清之乃言曰丞相以清之從遊之久故使布腹心於足下今足下不答一語則清之將何以復命于丞相昀始拱手徐答曰紹興老母在清之以告彌遠益相與嘆

其不凡竝跂足以需宣召久而不至彌遠在禁中遣快行宣皇子令之曰今所宣是沂靖惠王府皇子非萬歲巷皇子苟誤則汝曹皆處斬竝不能自己屬目墻壁間見快行過其府而不入疑焉已而擁一人徑過天已暝不知其為誰甚惑昀既至彌遠引入樞前舉哀畢然後召竝竝聞命亟赴至則每過宮門禁衛拒其從者彌遠亦引入樞前舉哀畢引出帷殿帥夏震守之既而召百官立班聽遺制則引竝仍就舊班竝愕然曰今日之事

我豈當仍在此班震給之曰未宣制以前當在此宣制
後乃即位耳竑以為然未幾遙見燭影中一人已在御
坐宣制畢閣門贊呼百官拜舞賀新皇帝即位竑不肯
拜震捽其首下拜皇后矯遺詔竑開府儀同三司進封
濟陽郡王判寧國府帝因加竑少保進封濟王九月丁
丑以竑充醴泉觀使令就賜第寶慶元年正月庚午湖
州人潘壬與其弟丙謀立竑竑聞變匿水竇中壬等得
之擁至州治以黃袍加身竑號泣不從不獲已與之約

曰汝能勿傷太后官家乎衆許諾遂發軍資庫金帛會子犒軍命守臣謝周卿率官屬入賀偽為李金榜揭于門數彌遠廢立罪云今領精兵二十萬水陸進討比明視之皆太湖漁人及巡尉兵卒不滿百人耳竑知其謀不成率州兵討之遣王元春告于朝彌遠命殿司將彭任討之至則事平彌遠令客秦天錫託召醫治竑疾竑本無疾丙戌天錫詣竑諭旨逼竑縊于州治帝輟朝賻銀絹各一千會子萬貫贈少師保靜鎮潼軍節度使給

事中盛章權直舍人院王堅一再繳奏詔從之右正言
李知孝累奏追奪王爵降封巴陵縣公于是在廷之臣
真德秀魏了翁洪咨夔胡夢昱等每以竑為言彌遠輒
惡而斥遠之端平元年詔復官爵妻吳氏為比丘尼賜
惠淨法空大師月給鉢錢百貫景定五年度宗降詔追
復元贈節度使德祐元年提領戶部財用兼修國史常
楙請立竑後試禮部侍郎兼中書舍人王應麟請更封
大國表墓賜謚命大宗正司議選擇立後迎善氣銷惡

運莫先於此下禮部議贈太師尚書令依舊節度使陞
封鎮王謚昭肅以田萬畝賜其家遣應麟致祭

宋史卷二百四十六

宋史卷二百四十六考證

鎮王竑傳客秦天錫○宋通鑑作余天錫

宋史卷二百四十六考證

欽定四庫全書薈要卷五千八百七十五

史部

宋史卷二百四十七

元中書右丞相總裁托克托等修

列傳第六

宗室四

子湑

子崧

子櫟

子砥

子晝

子瀟

師曩

希言

希懌

士晤

士儂

士崕

士晴

不羣

不棄

不尤

不恩

善俊

善譽

汝述

叔近

叔向

彥倓

彥櫛

彥逾

子洳字正之燕王五世孫父令鏐官至寶文閣待制子洳以蔭補承務郎累遷少府監主簿改河南少尹時治西內子洳有幹才漕使宋昇器之或事有未便子洳輒力爭昇每改容謝之除蔡河撥發綱運官會夏旱河水

涸轉餉後期貶秩一級提舉三門白波輦運事除直秘閣丁內艱起復累進龍圖閣祕閣脩撰除陝西轉運副使初蔡京鑄夾錫錢民病壅滯子洙請鑄小鐵錢以權之因範格以進徽宗大說御書宣和通寶四字爲錢文既成子洙奏令民以舊銅錢入官易新鐵錢旬日易得百餘萬緡帝手札以新錢百萬緡付五路均糴細麥命子洙領其事民苦限迫詣子洙訴者日數百人子洙奏請寬其期民便之會蔡京再相言者希京意論子洙亂

錢法落職奉祠靖康初復祕閣脩撰金人侵洛子洙奔荆南潰兵祝靖盛德破荆南城子洙匿民家靖等知之來謁言京城已破子洙泣說之曰君輩宜亟還都城護社稷取功名無貪財擾州縣也皆應曰諾子洙因草檄趣之翌日靖等遂北行紹興元年召見復徽猷閣直學士知西外宗正司改江西都轉運使時建督府軍需浩繁子洙運餉不絕以功進寶文閣直學士再知西外宗正司三京新復除京畿都轉運使以疾辭卒於家年六

十七子直幼警悟蘇軾過其家抱置膝上謂其父曰此公家千里駒也及長善談論工詩然崇寧大觀間土木繁興子直每董其役識者鄙之

子崧字伯山燕懿王後五世孫登崇寧五年進士第宣和間官至宗正少卿除徽猷閣直學士知淮寧府汴京失守起兵勤王道阻未得進聞張邦昌僭位以書白康王宜遣師邀金人河上迎請兩宮問罪僭逆若議渡江恐誤大計遂與知潁昌府何志同等盟傳檄中外已而

聞金人退引兵襄邑遣范損徐文中詣濟王請王進兵
南京且言國家之制無親王在外者主上特付大王以
元帥之權此殆天意亟宜承制號召四方豪傑則中原
可傳檄而定王命子崧充大元帥府參議官東南道都
總管邦昌家在廬州子崧檄通守趙令儵幾察之且請
捕誅其母子以絕姦心又言自圍城以來朝命隔絕乞
下諸路凡有事宜並取大元帥府裁決僞檄毋輒行宣
撫使范訥逗撓營私所宜加罪宜蠲被兵州縣租經理

淮南荆浙形勢之地毋爲羣盜所據檄止諸路毋受邦
昌僞赦移書責邦昌曰人臣當見危致命今議者籍籍
謂劫請傾危之計實由閣下不然金人何堅拒孫傅之
請而卒歸於閣下也敵既遠去宜速反正若少遲疑則
天下共誅逆節雖悔無及矣又遺書王時雍曰諸公相
與亡人之國方且以爲佐命功臣不知平日所學何事
會邦昌遣使迎王次第白子崧子崧即貽王書曰似聞
謂以京師殘破不可復入止欲即位軍中便圖遷徙臣

竊惑焉夫欲致中興當謹舉措宜先謁宗廟覲母后明
正誅賞降霈四方若京師果不可都然後徐議所向遂
傳檄京師奏於隆祐太后曰諸路先聞二聖北遷易姓
改國恐間有假討逆之名以竊據州郡者乞速下明詔
諭四方以迎立康王之意庶幾人心慰安奸宄自消矣
尋以所部兵會濟州康王即位子崧請放諸路常平積
欠錢又言臺諫為人主耳目近年用非其人率取旨言
事請遵舊制聽學士中丞互舉范祖禹常安民上官均

先朝言事盡忠請錄其子帝皆可其奏因建三屯之議
一屯澶淵一屯河中陝華一屯青鄆間以張聲勢萬一
敵騎南侵則三道並進可成大功除延康殿學士知鎮
江府兩浙路兵馬鈐轄上章論王時雍徐秉哲吳升莫
儔范瓊胡思王紹王及之顏博文余大均等逼遷上皇
取太子辱六宮捕宗室竊禁物都人指為國賊伏望肆
諸市朝以為臣子之戒時滑州兩經殘破子崧薦傳亮
可任除亮滑州通判黃潛善沮之命遂寢賊趙萬犯鎮

江子崧遣將擊萬於丹徒調鄉兵乘城爲備頃之官軍敗歸鄉兵驚潰子崧率親兵保焦山寺賊據鎮江初昌陵復土司天監苗昌裔謂人曰太祖後當再有天下子崧習聞其說靖康末起兵檄文頗涉不遜子崧與御營統制辛道宗有隙道宗求得其文上之詔御史往案其獄情得帝震怒不欲暴其罪坐以前擅棄城降單州團練副使謫居南雄州紹興二年赦復集英殿脩撰而子崧已卒於貶所

子櫟燕懿王後五世孫登元祐六年進士第靖康中爲
汝州太守金人再渝盟破荆湖諸州獨子櫟能保境土
李綱言於朝遷寶文閣直學士尋提舉萬壽觀紹興七
年卒

子砥藝祖後令珣之子也仕至鴻臚丞北遷至燕山久
之欲遁歸乃遣其徒朱國寶王孝安至中京求得上皇
宸翰懷之以歸建炎二年六月至行在帝命輔臣召問
於都堂子砥言金人講和以用兵我國歛兵以待和往

者契丹主和議女真主用兵十餘年間竟滅契丹今復蹈其轍譬人畏虎啗虎以肉食盡終必食人若設陷穽待之庶能制虎因復故官已而賜對稱旨命知台州卒子晝字叔問燕王五世孫少警敏強記工書翰累官憲州通判宣和初克詳定九域圖志編修官出知澤州改密州詔爲刑部員外郎以憂去建炎四年遷吏部員外郎尋用大宗正士僊薦遷尚書左司員外郎兼權貨務歲收茶鹽香錢六百九萬餘緡以功進秩一階試太常

少卿集太常因草禮八十篇爲二十七卷上言復春分祀高禘禮除權禮部侍郎遷徽猷待制樞密都承旨以公族爲侍從及改官制後都承旨用文臣皆自子晝始衢嚴信饒之民生子多不舉子晝請禁絕之累求補外遷徽猷閣直學士知秀州既而奉祠以歸寓於衢紹興十二年卒年五十四

子瀟字清卿秦康惠王後孝靖公令奧之子也七歲而孤家貧力學登宣和中進士第調真州刑曹掾與守爭

獄事解官去改衢州推官胡唐老奇其才任之屬時多
故子瀟佐唐老繕完城具苗劉兵至城下不能攻以功
進一秩累官吏部郎中求補外遷戶部郎中總領江淮
軍馬錢糧諸司饋禮月以千緡悉歸之公帑除直秘閣
兩淮轉運副使朝廷遣人檢沙田蘆塲欲槩增租額子
瀟以承買異冒占力止之時議者言田之並太湖者被
水患宜分道諸浦注之江詔子瀟往案視還言太湖當
數州巨浸豈淞江一川所能獨泄昔人於常熟北開浦

二十四以達大江又開浦十於崑山東南以入海今皆
湮塞宜加疏浚從之遂浚常熟東柵至雉浦入於涇谷
又疏鑿福山塘至尚市橋北注大江分殺其勢水患用
息明州守趙善繼治郡殘酷子瀟率諸監司劾罷之除
直敷文閣知臨安府吏不能欺禁權家僮人子女爲僕
妾者詔權戶部侍郎陞華文閣待制復知臨安府調三
衙卒修築都城不擾而辦金主亮渝盟子瀟獻助軍錢
十五萬緡特遷一秩帝幸建康克行宮留守參謀官扈

蹕還復知臨安府金人來議和子瀟謂事情叵測宜以
軍禮待之孝宗嗣位志圖恢復子瀟練兵習爲鵝鸛魚
麗陣上觀於便殿嘉之賜金帶擢敷文閣直學士移知
明州沿海制置使臺諫王十朋王大寶抗疏留之帝曰
朕委以防海行召還矣初海寇以賂通郡胥吏吏反爲
之用匿其蹤跡賊遂大熾商舶不通子瀟以禮延土豪
俾率郡胥分道入海告之曰用命者有厚賞不則殺無
貸胥衆震恐爭指賊處悉禽獲凡豪猾爲賊囊橐者窮

治之海道遂平陞龍圖閣直學士知福州歲饑告糴旁
郡米價頓平民賴以濟進龍圖閣學士移知泉州吏有
掠民女爲妾者其妻妬悍殺而磔之貯以缶抵其兄興
化掾安廡中宮父詣郡訴吏不決子瀟訪知狀亟遣人
往興化果得缶以歸獄遂決其發擿槩類此乾道二年
卒於官年六十六

師異字從善系出燕懿王王生彰化軍節度使惟忠惟
忠生宣城侯從謹從謹生崇國公世恬世恬生嘉國公

令峻中興初韓世清挾令峻爲變裂黃旗被其身固拒
獲免令峻生朝奉郎子笈子笈生和州防禦使伯驕伯
驕少從高宗於康邸以文藝侍左右師異伯驕之子也
舉進士第除司農簿遷金部郎中孝宗奇其才顧遇頗
厚師異奏左右曹度支倉部宜立總計司歸併財物之
數以絕吏奸制可知吉州即山鍊銅足冶欠額二十萬
進戶部郎官淮東總領光宗初擢太府少卿知秀州改
淮南運判時郡鐵錢不行鹽商弗至師異請發度牒出

倉粟以收鐵錢鹽利遂通累遷司農卿知臨安府有僧
號散聖者以妖術惑衆師異捕治黥之韓侂冑用事師
異附之遂得尹京侂冑生日百官爭貢珍異師異最後
至出小合曰願獻少果核侑觴啟之乃粟金蒲萄小架
上綴大珠百餘衆慚沮侂冑有愛妾十四人或獻北珠
冠四枚於侂冑侂冑以遺四妾其十人亦欲之侂冑未
有以應也師異聞之亟出錢十萬緡市北珠製十冠以
獻妾爲求遷官得轉工部侍郎侂冑嘗飲南園過山莊

顧竹籬茅舍謂師異曰此真田舍間氣象但欠犬吠雞
鳴耳俄聞犬嗥叢薄間視之乃師異也侂冑大笑久之
以工部尚書知臨安府侂冑將用兵師異度侂冑材疎
意廣必召禍乃持異論侍御史鄧友龍劾罷之侂冑死
其黨多坐謫以師異嘗與侂冑異故獲用除寶謨閣直
學士知鎮江府會荆湖始置制閫以命師異給事中蔡
幼學繳其命遂罷歸未幾詔爲兵部尚書知臨安府幼
學時爲學士亦不草詔留元剛草之時楮輕糴貴師異

尹京未數月楮價寢昂糴亦稍平執政愈益賢之會武
學士柯子沖盧宣德以事至府師霁擅撻遣之衆盡謹
文武二學之士交投牒師霁乃罷免與祠卒於家年七
十師霁四尹臨安有能聲嘗鈎致民罪沒其家貲詔事
權貴人以是鄙之

希言字若訥惠王令憲元孫也淳熙十四年登第調衢
州司戶合郡民以計表其坊里標其戶數爲圖獻於守
守才之西安令不職守檄希言攝邑漕善令會嚴州請

復烏龍嶺稅場檄希言往訪之俾令得復職希言力陳
烏龍場不當復漕怒曰衢已復孔步章戴二場何烏龍
獨不可復希言謂二場當併罷去漕不能奪二場竟亦
廢改吉州司理屬邑有誣人以殺人罪者吏治之急因
誣服希言鞫得實檄縣他捕乃得真盜用楊萬里周必
大薦授臨安府司法改淮西總所幹辦移書約諸郡綱
必時發至即受納無滯留始至軍庫見錢不滿千緡比
去庫錢克溢知臨安仁和縣闢學田四百餘畝適大旱

蝗集御前蘆場中亘數里希言欲去蘆以除害中使沮其策希言驅卒燔之臨平塘隄決希言督役親捧土投石兵民爭奮堤成因築重隄後不復決民病和買絹折錢重希言節公費代其輸除大社令遷樞密院編脩官兼右司上言諸將但務城守敵來不拒去不復追異時之憂殆不止保江而已宜諭諸將一軍受圍諸軍共守敵不渡淮則均受賞以戰爲守毋以守爲守遷宗正丞請南班得與輪對許之累遷秘書丞著作郎軍器少監

皆兼右司又充密院檢詳爲宰屬樞掾凡六年奉祠去
嘉定十七年卒年六十一贈資政殿大學士封越國公
諡忠憲子與權登進士第再中刑法科官至開府儀同
三司

希懌字伯和燕王八世孫登淳熙十四年進士第趙汝
愚帥福建希懌爲屬吏嘗言治人如修身治政如理家
愛民如處昆弟取古今官著惠愛者緝爲一編曰是吾
師矣汝愚嘉之薦於憲辛棄疾棄疾尚氣僚吏不敢與

可否希懌獨盡言無所避屬邑侯官苦稅重每不登額
希懌稽核公帑羨錢以足之棄疾亦薦其能汝愚當國
調江東運司幹辦同寅有坐侂冑黨者諸司莫敢薦希
懌賢其人請以薦已者薦之改太平州通判先是盜黥
而逃者捕得處死希懌言強盜特貸命而輒逃者斬今
黥罪致死非法之平也自是皆減死論遷江西茶鹽提
舉歲饑惡少聚劫希懌將自臨按幕屬力止之不聽曰
希懌不出饑民終不得食且召亂矣遂行發粟賑給禽

首謀者治之其黨遂散陞本路帥兼漕事黑風峒羅世傳寇郴陽奸民潛通賊陰濟以糧希惲捕治之賊乏食乃去未幾李元礪寇郴陳廷佐寇南安復誘羅世傳與合劫掠至龍泉有何光世者能知賊動息希惲授光世計俾誘世傳誅元礪以自贖功未竟移知平江府其後世傳果縛元礪以獻廷佐勢孤亦降移知太平州希惲爲倅日習知其民利病遂損折市價減榷酤額以蘇民力已而乞祠遷端明殿學士換昭信軍節度使開府儀

同三司致仕嘉定五年卒年五十八贈少保封成國公
士晤字公美濮安懿王曾孫也天資警敏兒時儼如成
人比弱冠爲右監門衛大將軍貴州團練使從上皇北
遷次洺州東與諸宗室議欲遁還據城謀未就而金人
圍合皆散走士晤乘驢西亡夜半盜斂驢去徒步疾趨
遲明抵武安酒家語人曰我皇叔也邑官聞之來謁資
以衣冠鞍馬因募得少壯百餘人從至磁州招集義兵
以解洺圍旬日間得勝兵五千人歸附者數萬時洺州

守臣王麟欲叛降敵軍民怒殺之推統制韓一爲主士
晤夜半薄城下力戰破圍翌日入城部分守禦敵治壕
塹樹鹿角示以持久士晤礪將士死守飛火砲碎其攻
具以計生得其首領敵乃解圍去以功遷權知洺州仍
兼防禦使建炎二年金人再犯洺糧盡援絕衆不能守
乃擁士晤出城由白家灘抵大名府詔赴行在紹興五
年遷泉州觀察使再遷平海軍承宣使知南外宗正事
時泉邸新建向學者少士晤奏宗子善軫文藝卓絕衆

所推譽乞免文解由是人知激勸遷節度使未拜而卒
年四十六贈少師追封和義郡王淳熙中諡忠靖子不
流歷臨安紹興帥治有聲

士儂字立之郇康孝王仲御第四子有大志好學善屬
文初補右班殿直累遷忠州防禦使鄭州觀察使由寧
遠軍承宣使轉權同知太宗正事時康王建大元帥府
士儂請於孟太后乞命帥府得承制便宜行事又請奉
王承大統太后從之王遂即位除光山軍節度使扈蹕

南辛黃潛善等用事士儼論其誤國潛善斥之出知南
外宗正事會苗傅劉正彥作亂士儼易服入杭以蠟書
遺張浚趣其勤王復遺呂頤浩書勉其與浚同濟國難
苗傅等怒浚浚坐謫復遺浚書謂朝廷無他意俾賊勿
疑耳事平加檢校少保除同知大宗正事丁母憂起復
除大宗正事請序位安定郡王下從之累乞祠不許以
定策功詔其子不議改文秩不恤易環衛官加士儼檢
校少師尋加開府儀同三司判大宗正事入覲勸帝留

意恤民金人既歸河南陝西地命士儂謁陵寢遂入柘
城披歷榛莽隨宜葺治禮畢而還特封齊安郡王以旌
其勞尋權主奉濮安懿王祠事軍興罷宗室賜予至有
喪不能歛者士儂以聞詔總麻袒免親任環衛官而身
亡者賜錢有差士儂數言事忤秦檜及岳飛被誣士儂
力辨曰中原未靖禍及忠義是忘二聖不欲復中原也
臣以百口保飛無他檜大怒諷言者論士儂交通飛蹤
迹詭秘事切聖躬遂奪官中丞万俟卨復希旨連擊之

謫居於建凡十二年而薨年七十帝哀之贈太傅追封
循王六子皆進官二階長子不凡方苗傳之亂封股納
蠟書持告張浚以功轉兩官易文資從趙哲收復建州
殺葉濃以功賜爵二級

士崙字仰夫太宗五世孫初以廕補官累轉太子率府
副率建炎初隆祐太后幸洪州敵奄至百司散走士崙
至一大船中見二帝御容負以走遇潰兵數百同行至
山中衆欲聚爲盜士崙出御容示之曰盜不過求食爲

朝夕計耳孰若仰給州縣士崙以近屬諭之必從如此
則今日不饑餓後日不失賞是一舉而兩得也衆聽命
乃走謁太后虔州會虔民作亂鄉兵在外爲應與官軍
相持士崙詣執政謂當請太后急肆赦人知免死庶可
安集又宜急諭城中城中定則外寇可弭譬如服藥心
腹已安外禦風濕乃餘事耳赦既下城中遂定遷右監
門衛大將軍惠州防禦使紹興二十一年卒贈建寧軍
承宣使追封建安郡王

士晴太宗之後商濮王之裔也從上皇俱北遷乘間變姓名入僧寺中落髮衣僧衣以行抵會稽扈駕巡幸以覃恩轉千牛衛將軍奉朝請而卒

不羣字介然太宗六世孫宣和中量試授承事郎靖康初宰濟南章邱縣縣當山東河北之衝不羣募効用五千人增城浚濠爲戰守備敵攻圍兩月不能下遷維州通判陞直秘閣通判鎮江府辟克兩浙宣撫司主管機宜文字高宗在越詔改郴州時羣盜出沒湖湘間不羣

嚴備禦盜不能犯進直顯謨閣移知鼎州克湖北兵馬副鈐轄既而朝廷慮郴失守復留不羣於郴會岳飛破曹成遁因犯郴不羣乘城固守拒卻之進直寶文閣移知宣州軍需以時辦而民不擾進秩二階知廬州鄴瓊叛擁不羣北去尋釋之以歸帝召見問瓊叛故不羣曰由劉錡除制置瓊等以爲圖已兼撫諭後時故叛帝悔之除知荆南府累遷兩浙路轉運副使卒於官

不棄字德夫太宗之裔紹興中爲江東轉運判官秦檜

忌四川宣撫使鄭剛中以不棄能制之除太府少卿四
川宣撫司總領官初趙開總蜀賦宣撫司文移率用申
狀不棄至官用張憲成故事以平牒見剛中剛中愕然
久之始悟其不隸已遂有隙不棄欲盡取宣撫司所儲
剛中不與不棄怒剛中辟利州轉運使王陟兼本司參
議不棄劾罷之二人愈不相能檜併召還剛中在蜀服
用頗踰制不棄復文致其事檜乃罷剛中陞不棄敷文
閣待制知臨安府踰年改工部侍郎尋除敷文閣直學

士知紹興府時浙東旱饑民多流亡提舉秦昌時檜兄子也不棄言其悉心振恤全活甚衆昌時得遷秩其媚檜如此未幾卒

不尤有武力靖康之難與王明募義兵與金人戰雄張河南北盜皆避其鋒曰此小使軍也高宗即位引衆歸補武翼郎從岳飛平湖寇飛死檜奪其兵遣守橫州而卒子善悉進士登第累官敷文閣直學士兩浙轉運副使

不憚字仁仲嗣濮王宗暉曾孫也父士圃從上皇北遷
遙拜集慶軍節度使不憚初補保義郎紹興二十七年
登第易左宣義郎調婺州金華丞治縣豪何汝翼械請
於郡編隸他州邑人懼服除永州通判郡歲輸米倍收
其贏民病之不憚言於守損其數帥司檄不憚錄靖州
獄辯出寃者數十百人靖人德之繪其像以祠除知開
州開在巴東俗鄙陋不憚爲興學俾民知孝義郡有鹽
井舊長吏必遣所親監之私其利不憚罷遣鹽利倍入

郡計用饒以羨餘代民輸夏秋兩稅及天申節銀絹在
開二年民絕鬪爭夜戶不閉諸司交薦以比古循吏轉
夔州轉運判官開人數千遮城門不得行至夔民病上
供銀時部使者以親故攝大寧鹽場專其利不恩斥去
而鹽獲羨餘乃出錢市羨鹽數十萬斤易米得三萬餘
斛運抵湖北省銀以歸代諸郡納上供銀省緡錢十五
餘萬改成都路轉運判官適歲饑不恩行抵瀘南貸官
錢五萬緡遣吏分糴比至下令曰米至矣富民爭發粟

米價遂平雙流朱氏獨閉糴邑民羣聚發其廩不恧抵
朱氏法籍其米黥盜米者民遂定永康軍歲治都江堰
籠石蛇絕江過水以灌數郡田吏盜金減役夫堰不固
而圯田失水故歲屢饑不恧躬視操板築繩吏以法乃
出令民業耕者田主貸之事末作者富民振之老幼疾
患者官爲粥視全活數百萬黎州青羌奴結兒反制司
調兵往戍屬不恧給餉故事富人出糧而下戶以力致
于邊不恧曰民饑不可擾也以糴餘米發卒運之已而

朝廷命不憚攝制司初官兵敗前制使遣人賂奴結兒以和不憚曰奴結兒吐蕃小種也今且和若大族何不聽會酋豪夢東畜列率數千人入漢地二百餘里成都大恐不憚靜以鎮之召僚屬飲夜遣步將領飛山軍徑赴沉黎又徙綿州兵戍邛州爲後援戒之曰堅守勿動密檄諸蕃部生獲吐蕃一人賞十縑殺一人二縑於是邛部川首領崖襪合諸部落大破吐蕃於漢源斬夢東畜列首來獻凡十有六日而平嘉州虛恨蠻入寇不憚

標吐蕃首境上蠻懼一夕遁去不怠乃令緣邊家出丁夫一人分戍諸堡復其家不怠罷歸蜀人送者沿成都至雙流遮道不得行未幾除成都提刑改江西路轉運判官廷臣薦其賢詔授右監門衛大將軍惠州防禦使知大宗正事非常制也吏白承受奏請湏用中貴人不怠曰有司不存乎罷不用中貴人或請見輒謝出之進明州觀察使俄陞招慶軍承宣使金人完顏烈來聘充館伴副使金使從者舊見館使皆對揖不怠不爲禮宴

玉津園不怠連射皆中使者驚服不怠以文行訓勉族屬薦其秀傑者奏新學宮增廣弟子員倣大學校定法置自訟齋使有過者讀書其中人人感勵淳熙十四年卒年六十七贈開府儀同三司封崇國公不怠性篤孝生七歲遭父北遷每思慕涕泣長力學母曹氏止之答曰君父讐未報非敢志富貴也登第時已入仕法當超兩秩請回授其母母封法止令人高宗嘉其志特封郡夫人居官所至有聲立朝好言天下事蜀中武帥操重

權不怠請復置安撫司相維而治其論王忤不宜揀選
諸路軍王友直不可爲副都指揮使尤人所難言者遇
大旱一日九疏勸上求直言通下情退而燔其藁時布
衣上書狂悖多抵罪不怠謂太上皇帝不罪言者此宜
書之御座右帝悚然可之既嘉其忠諫每宴禁中帝飲
之酒顧謂皇太子曰此賢宗室也一日坐待漏院有給
事中白英國公借擊毬馬不怠正色曰上惟一皇孫萬
一馬驚墮斬汝輩無益也馬竟不可得所敬者朱熹張

栳栳死爲請諡又請用燾其好尚如此

善俊字俊臣太宗七世孫父不衰閩路兵馬鈐轄善俊
初補承節郎紹興二十七年登第換左承務郎調南城
丞改昭信軍簽判奇之虞允文亦薦其有邊帥才除幹
辦諸司審計司知郴州敷奏稱旨留爲太府寺丞尋攝
帥知廬州會歲旱江浙饑民麋至善俊括境內官田均
給之貸牛種僦屋以居死者爲給槨人至如歸州城舊
毀於兵善俊葺完之因言異時恃焦湖以通饋餉今既

堙涸宜募鄉兵保孤姥二山治屋以儲粟敵或敗盟則
吾城守有餘餉道無乏矣又增築學舍新包拯祠春秋
祀之人感其化累遷龍圖閣直學士移知建州建俗生
子往往不舉善浚痛繩之給金穀捐已俸以助其費再
知廬州首言和好不可恃當高城浚池以爲備復芍陂
七門堰農政用修免責屬邑坊場河渡羨錢百姓德之
以父憂去服闋起知鄂州適南市火善俊亟往視事弛
竹木稅發粟振民開古溝創火巷以絕後患僚屬爭言

用度將不足善俊曰吾將瘠己肥人乃省燕游車騎鼓吹之費郡計用饒代輸民役錢再知建州歲饑民羣趨富家發其廩監司議調兵掩捕善俊曰是趣亂也諭許自新平米價民乃定邑尉入盜十三人死罪以希賞善俊辯其寃徙知隆興府移江西轉運副使時朝廷議減月椿錢善俊言及州不及縣則縣仍迫取於民猶不減也宜一路通裁其額下之漕臣科郡縣輕重均減之又奏和買已是白科從而折變益加糜費其數反重於正

絹帛乞蠲減黥卒遇赦還者刺克鋪兵可除民害所言
多見用轉湖南帥郴桂地絕遠守多非才善俊謂宜精
其選代輸潭州經總制錢停醴陵淶水渡錢加秘閣修
撰移知鎮江府丁母憂終喪而卒年六十四善俊風儀
秀整喜功名尤好論事孝宗時日中有黑子地屢震每
以飭邊備為戒孝宗英武獨運缺相者累年善俊極言
相位不可無人尤人所難言者

善譽字靜之父不倚太宗之後也善譽幼敏慧力學乾

道五年試禮部第一初調昌國簿攝邑事勸編戶裒金
買田以助嫁娶喪葬捕得海盜全黨守欲上其功善譽
曰奈何以人命希賞守益賢之薦于朝授兩浙運幹改
知撫州臨川縣縣嘗預借民賦善譽閱籍發逋負按籍
征催卒以時辦集遂罷預借改常州添差通判史浩言
其賢詔赴部堂審察累遷大理丞湖北常平茶鹽提舉
會大旱善譽通融諸郡常平計戶振貸嗣歲麥禾倍收
民爭負以償奏罷稅場十餘渡四十五民便之俾諸郡

售田委郡文學董其入以給計偕者移潼川路提刑轉
運判官遂寧守徐詡乏廉聲部使者以其故御史寬假
之善譽過遂寧詡出迎善譽抑使循廊詡大沮郡人聞
之爭訟其過善譽劾諸朝宰相王淮善詡寢其章善譽
徑以聞罷詡又以羨貲給諸郡置莊民生子及娠者俱
給米威惠並孚宗子寓蜀者少業儒善譽即郡庠立學
以教之人始感勵引年乞祠歸處一室以圖書自娛無
疾而卒年四十七時淳熙十六年也善譽早失怙恃撫

育諸李備至居官廉靖自將多所著述郭雍朱熹嘗取其易說云

汝述字明可太宗八世孫曾祖士說從二帝北遷臨河罵敵而死汝述登淳熙十一年進士第調南劍州順昌尉嘉定六年詔主管官告院自是常兼宰士累遷將作少監權侍立修注官八年除起居郎兼密院都承旨俄遷兵部侍郎以母憂去服闋改刑部侍郎遷尚書知平江府卒汝述為尉應詔上封事論議懇惻立朝薦引多

知名之士然為時相所親躡躋通顯人亦以此少之

叔近悼王元孫榮良公克類之子也建炎元年為秀州守杭卒陳通反詔辛道宗將西兵討之兵潰為亂抵秀州城下叔近乘城諭以禍福亂兵乃去未幾差權兩浙提刑叔近招通通聽命叔近以素隊數十人入賊城衆猶不解甲叔近置酒推誠待之遂皆感服城中稍定叔近奏通初無叛心止緣葉夢得賞不時給遂至紛爭今已就招請赦其徒二百餘人帝許之臺諫皆言不可遂

寢叔近還秀州已而王淵兵至杭詐傳呼云趙秀州來
通郊迎淵遂誅之初淵在汴京狎娼周氏周氏後歸叔
近淵銜之乃誣叔近通賊奪職拘於州以朱芾代之芾
肆殘虐軍民怨憤小卒徐明率衆囚芾迎叔近領郡事
叔近不得辭因撫定之請擇守於朝奏未達朝廷命張
俊致討俊淵部曲也辭行淵謂之曰叔近在彼俊喻意
領兵至郡叔近出迎俊叱令置對方操筆羣刀遽前斷
其右臂叔近呼曰我宗室也俊曰汝既從賊何云宗室

語未竟已折首於地徐明等見叔近死遂反戈嬰城縱火驅掠翌日俊斬關入捕明等誅之取周氏歸於淵紹興九年御史言叔近之寃贈集英殿脩撰

叔向魏王之系也方汴京破時叔向潛出之京西金人退引衆屯青城入至都堂叱王時雍等速歸政置救駕義兵其後為部將于渙上變告叔向謀為亂詔劉光世捕誅之

彥俠字安卿彭城侯叔聚曾孫也父公廣饒州太守彥

倭初調溧陽尉邑民潘氏兄弟橫邑中號三虎畜僮僕數百邑官莫敢誰何彥倭白其守治之縛潘氏昆弟正其罪改揚州司戶攝獄掾有告主藏吏盜錢餘千萬治之急吏泣請死彥倭察其情屏人問則諸吏共貸也乃許自首免罪一日而畢改平江府推官攝宜興縣縣自中興後預借民明年稅民挾此得慢其令彥倭請禁預借邑遂易治知臨安於潛縣縣胥往往通臺省吏得肆其奸彥倭執其黠者械送府臺省吏從中救之彥倭力

爭竟抵胥罪浮橋屢以水敗彥俠梁以石民免溺死陞
臨安府通判開禧初知興國軍歲旱蝗而軍需益急屬
邑令吳格負上供銀尤多彥俠坐累貶秩格愧謝彥俠
曰屬時多艱宜寬民力以崇根本何謝為潰卒據外城
為變彥俠募能斬捕者賞之既而各斬首以獻散其餘
黨累遷湖南運判徭人羅孟傳反累歲不能平彥俠謂
帥臣曰徭人讐殺乃其常情況主斷不平是激之使叛
也能遣諜者離其黨與俾還自相讐破之易矣帥從其

計遂降孟傳尋知紹興府楮價輕彥倓權以法民便之
復鹿鳴禮置興賢莊以資其費築捍海石塘亦置莊以
備增築會旱饑民聚陂湖中彥倓取死囚幕首刎足徇
於衆曰此劫掠竊者也遂散其衆乃第民高下損其稅
有差免輸湖籍田米舉緡錢四十萬以助荒政民賴以
濟詔改太府少卿遷顯謨閣知太平州調江西轉運使
嘉定十一年卒於官年六十四

彥櫛字文長悼王七世孫祖訓之在忠義傳彥櫛登乾

道二年進士第尉樂清會大旱令循故事禱雨而責租益急彥楠曰損歛已責所以招和氣何禱為已而果雨累官福建路運幹屬邑負振鹽本錢數千萬累歲不能償彥楠白其長蠲之慶元初知晉陵縣歲饑彥楠振恤有方所活幾二十萬又以羨錢為五等戶代輸擢監登聞檢院時韓侂胄方柄用朝士悉趨其門彥楠切歎惋出知汀州州民葉姓者嘯聚汀贛間彥楠遣將捕戮之遷廣西提刑諸郡鬻官鹽取息之六以奉漕司後增至

八分彥橐復其舊以蘇民力朝廷從之侂冑死詔戶部侍郎兼樞密院檢詳士大夫前與兵議者坐侂冑黨將併逐之彥橐歎曰士方以偽學廢今又以兵端斥去苟欲錮士何患無名每見帝必言才難遷湖廣總領舊士卒物故大將不落其籍而私其月請彥橐置別籍稽核之或傳軍中有怨言彥橐曰不樂者主帥耳何損士卒持之三年掛虛籍者贏三萬額減錢百萬緡用度以饒比去餘七百萬而諸路累積逋負猶四百萬盡蠲之知

平江府郡之崑山並大海盜出沒莫可蹤迹彥橐奏分其半置嘉定縣屯兵以守轉寶謨閣待制卒於官年七十一

彥逾字德先魏悼王後崇簡國公叔寓曾孫也紹興三十年登第淳熙五年知秀州累遷太府少卿四川總領將入境利西帥吳玠遣屬吏安丙來迓彥逾見即喜其人從容問之曰太尉統衆六萬得無虛籍乎丙以情告彥逾遺挺書俾損虛籍數千以寬四川之賦挺不敢隱

改知鎮江府郡適旱饑彥逾節浮費發粟振糶民賴以
濟遷戶部侍郎工部尚書孝宗崩光宗疾不能持喪樞
密趙汝愚議請立嘉王為皇帝欲倚殿帥郭杲為用遣
中郎將范任告之杲不應時中外洶洶彥逾見汝愚對
泣汝愚密告以翌戴之議彥逾大喜力贊其決郭杲嘗
被誣彥逾為白於帝杲德之遂馳告杲曰彥逾與樞密
第能謀之耳太尉為國虎臣當任其責杲未及對彥逾
急責之杲許諾遂領兵為衛寧宗即位汝愚謂彥逾曰

我輩宗臣不當言功會留正免相汝愚登右揆彥逾以
端明殿學士出知建康兼江東安撫使未行改四川安
撫制置使兼知成都府彥逾為政不擾蜀人便安之以
定策勲累遷資政殿大學士嘉泰間知明州兼沿海制
置使嘉定間乞祠以歸尋卒彥逾始與汝愚協濟大計
冀汝愚引已共政及外除頗缺望乃疏當時名臣上之
目為汝愚黨帝由是疑汝愚其兩入蜀皆有聲然吳氏
世守武興兼利西安撫操重權吳挺卒朝廷用卹宥議

併利西安撫於東路以革世將之弊而彥逾奏復利西
安撫乃領以武帥其後吳曦因之以生變人以是咎彥
逾云

宋史卷二百四十七

欽定四庫全書薈要卷五千八百七十六

史部

宋史卷二百四十八

元中書右丞相總裁托克托等修

列傳第七

公主

秦國大長公主

太祖六女

太宗七女

真宗二女

仁宗十三女

英宗四女

神宗十女

哲宗四女

徽宗三十四女

孝宗二女

光宗三女

魏惠獻王一女

寧宗一女

理宗一女

秦國大長公主太祖同母妹也初適朱福德福德卒太祖即位建隆元年封燕國長公主再適忠武軍節度使高懷德賜第興寧坊開寶六年十月薨太祖臨哭廢朝五日賜諡恭懿真宗追封大長公主元符三年改秦國

政和四年改封恭懿大長帝姬有姊一人未筓而夭建隆三年追封陳國長公主元符改封荆國大長公主政和改封恭獻大長帝姬

太祖六女申國成國永國三公主皆早亡

魏國大長公主開寶三年封昭慶公主下嫁左衛將軍王承衍賜第景龍門外太宗即位進封鄭國淳化元年改封秦國真宗至道三年進長公主大中祥符元年薨賜諡賢肅元符改封魏國大長公主政和改賢肅大長

帝姬

魯國大長公主開寶五年封延慶公主下嫁左衛將軍
石保吉太宗即位進封許國淳化元年改晉國真宗初
進長公主大中祥符二年進大長公主薨賜諡賢靖元
符改封魯國政和改賢靖大長帝姬

陳國大長公主開寶五年封永慶公主下嫁右衛將軍
魏咸信太宗即位進封虢國淳化元年改齊國真宗初
進許國長公主咸平二年薨諡貞惠後改恭惠景祐三

年追封大長公主元符改封陳國政和改賢惠大長帝
姬

太宗七女長滕國公主早亡

徐國大長公主太平興國九年封蔡國下嫁左衛將軍
吳元扆淳化元年改魏國薨諡英惠至道三年追封燕
國長公主景祐三年進大長公主元符改徐國政和改
英惠大長帝姬

邠國大長公主太平興國七年為尼號員明大師八年

卒至道三年追封曹國長公主景祐三年進大長公主
元符改邠國

揚國大長公主至道三年封宣慈長公主咸平五年進
魯國下嫁左衛將軍柴宗慶賜第普寧坊宗慶禹錫之
孫帝命主以婦禮謁禹錫第歷徙韓魏徐福四國仁宗
立進鄧國大長公主明道二年薨進封晉國諡和靖元
符封揚國政和改和靖大長帝姬主性妬宗慶無子以
兄子為後

雍國大長公主至道三年封賢懿長公主咸平六年下
嫁右衛將軍王貽永進封鄭國賜第景德元年薨諡懿
順景祐三年追封大長公主皇祐三年改韓國徽宗改
封雍國政和改懿順大長帝姬

衛國大長公主至道三年封壽昌長公主大中祥符二
年進封陳國改吳國號報慈正覺大師改楚國又改邠
國天禧二年改建國乾興元年封申國大長公主天聖
二年薨賜諡慈明徽宗改衛國政和改慈明大長帝姬

荆國大長公主幼不好弄未嘗出房閨太宗嘗發寶藏
令諸女擇取之欲以觀其志主獨無所取真宗即位封
萬壽長公主改隨國下嫁駙馬都尉李遵勗舊制選尚
者降其父為兄弟行時遵勗父繼昌亡恙主因繼昌生
日以舅禮謁之帝聞密以兼衣寶帶器幣助其為壽遵
勗賓客皆一時賢士每燕集主必親視饗餼嘗有盜入
主第帝命有司訊捕主請出所逮繫人以私錢募告者
果得真盜法當死復請貫之歷封越宿鄂冀四國明道

元年進魏國初遵勗出守許州暴得疾主亟欲馳視之左右白須奏得報乃可行主不待報而往從者纔五六人帝聞遽命內侍督諸縣邏兵以衛主車其後居夫喪衰麻未嘗去身服除不復御華麗嘗燕禁中帝親為簪花辭曰自誓不復為此久矣嘗因浴仆地傷右肱帝遣內侍責侍者主曰年衰力弱不任步趨非左右之過由是悉得免主善筆札喜圖史能為歌詩尤善女工之事嘗誡諸子以忠義自守無恃吾以速悔尤視他子與已

出均及病目帝挾醫診視自后妃以下皆至第候問帝親舐其目左右皆感泣帝亦悲慟曰先帝伯仲之籍十有四人今獨存大主柰何嬰斯疾復顧問子孫所欲主曰豈可以母病邀賞邪賚白金三千兩辭不受帝因謂從臣曰大主之疾倘可移於朕亦所不避也主雖喪明平居隱几沖淡自若誠諸子曰汝父遺令柩中無藏金玉時衣數襲而已吾歿後當亦如是皇祐三年薨年六十四帝臨奠輟視朝五日追封齊國大長公主諡獻穆

徽宗改封荆國政和改獻穆大長帝姬

真宗二女長惠國公主早亡

昇國大長公主初入道明道二年封衛國長公主號清
虛靈照大師慶歷七年追封魯國諡昭懷徽宗改封昇
國大長公主政和改昭懷大長帝姬

仁宗十三女徐國鄧國鄭國楚國商國魯國唐國陳國
豫國九公主皆早亡

周陳國大長公主帝長女也寶元二年封福康嘉祐二

年進封充國主幼警慧性純孝帝嘗不豫主侍左右徒
跣顙天乞以身代帝隆愛之帝念章懿太后不及享天
下養故擇其兄子李瑋使尚主瑋朴陋與主積不相能
主中夜扣皇城門入訴瑋皇懼自劾諫官王陶論宮門
夜開乞繩治護衛御史又共論主第內臣多不謹帝為
黜都監梁懷一輩十餘人後數年不復協詔出瑋於外
主降封沂屏居內廷久之復召瑋使為駙馬都尉如初
英宗立進越國長公主神宗治平四年進楚國大長公

主熙寧三年薨年三十三以瑋奉主無狀貶陳州輔臣
議諡帝以主事仁祖孝命曰莊孝追封秦國徽宗加周
陳國政和改封莊孝明懿大長帝姬

秦魯國賢穆明懿大長公主仁宗皇帝第十女也母曰
周貴妃嘉祐五年封慶壽進惠國治平四年進魯國大
長公主下嫁吳越忠懿王之曾孫右領軍衛大將軍錢
景臻改韓周燕國徽宗朝進秦魏兩國政和三年更封
令德景行大長帝姬靖康二年諸帝姬北徙姬以先朝

女金人不知留於汴建炎初復公主號改封秦魯國避地南渡賊張遇掠其家中子愕被害公主至揚州朝謁復避地之閩紹興三年自閩至會稽請入見因留居焉後徙台州上以公主行尊年高甚敬之每入內見必先揖靖康中戚里例納節至是公主為其子忱請還舊官上以忱為瀘州節度使仍詔戚里不得援例久之又為忱請優賜推恩上重違之加忱開府儀同三司時主有三子恟愷非己所出故獨厚於忱上戒之曰長主壽考

如此乃仁宗皇帝四十二年深仁厚澤是以鍾慶於長
主長主待遇諸子宜法仁宗用心之均一主感服薨年
八十六上輟朝五日幸其第臨奠詔子孫皆進官一等
諡曰賢穆二十九年加諡明懿

充國大長公主帝第十一女也嘉祐六年封永壽進榮
國長公主治平四年進祁國大長公主熙寧九年改魯
國下嫁左領軍衛大將軍曹詩主性儉節於池臺苑囿
一無所增飾十年夏旱曹族以主生日將盛具為壽主

曰上方損膳徹樂吾何心能安悉屏之元豐六年薨年二十四追封荆國諡賢懿遷其二子曠旼皆領團練使徽宗追封兗國又改賢懿恭穆大長帝姬

燕舒國大長公主帝第十二女也嘉祐六年封寶壽八年進封順國長公主治平四年進冀國大長公主元豐五年改魏國下嫁開州團練使郭獻卿八年進楚國徽宗改吳國進吳越國改秦兗國政和二年薨追封燕舒國諡懿穆復改懿穆大長帝姬

英宗四女舒國公主早亡

魏楚國大長公主帝長女嘉祐八年封德寧治平三年
進封徐國下嫁左衛將軍王師約四年進陳國長公主
元豐八年薨追封燕國大長公主諡惠和元祐四年追
封秦國徽宗追封魏國加韓魏國改魏楚國又改惠和
大長帝姬

魏國大長公主帝第二女母曰宣仁聖烈皇后嘉祐八
年封寶安公主神宗立進舒國長公主改蜀國下嫁左

衛將軍王詵詵母盧寡居主處之近舍日致膳羞盧病
自和湯劑以進帝厚於姊妹故主第池籩服玩極其華
縟主以不得日侍宣仁於寶慈宮居常悵然間遇早暎
帝降損以禱主亦如之曰我奉賜皆出公上固應同其
休戚帝居慈聖光獻皇后喪毀甚主曰吾與上同體視
此亦復何聊立散遣歌舞三十輩元豐三年病篤主性
不妬忌王詵以是自恣嘗貶官至是帝命還詵官以慰
主意太后臨問已不省后慟哭久稍能言自訴必不起

相持而泣帝繼至自為診脉親持粥食之主強為帝進
食賜金帛六千且問所須但謝復詵官而已明日薨年
三十帝未上食即駕往望第門而哭輟朝五日追封越
國諡賢惠後進封大長公主累改秦荆魏三國主好讀
古文章喜筆札調恤族黨中外稱賢詵不矜細行至與
妾姦主旁妾數抵戾主薨後乳母訴之帝命窮治杖八
妾以配兵既葬謫詵均州子彥弼生三歲卒

韓魏國大長公主帝第三女與魏國同生始封壽康公

主改祁國衛國下嫁張敦禮進冀國大長公主改秦越
楚國加今封政和三年改賢德懿行帝姬宣和五年薨
神宗十女楚國鄆國潞國邢國邠國兗國六公主皆早
薨

周國長公主帝長女也母曰欽聖憲肅皇后封延禧公
主生而警悟自羈紉習嗜宛如成人年十二卒帝后皆
變服哀送追贈燕國元符末改封周國

唐國長公主帝第三女也始封淑壽公主初帝念韓琦

功德欲與為婚姻故哲宗緣先帝意以主降琦之子嘉
彥歷封溫曹冀雍越燕六國政和元年薨追封唐國長
公主

潭國賢孝長公主帝第四女也母曰宋貴妃始封康國
紹聖四年下嫁王遇歷韓魯陳鄆四國大觀二年薨追
加封諡

徐國長公主帝幼女也母曰欽成皇后始封慶國進益
冀蜀徐四國年及笄猶處聖瑞宮侍母疾晝夜不暫去

藥餌非經手弗以進迨疾革號慟屢絕左右不忍視宗
寧三年下嫁鄭王潘美之曾孫意事姑修婦道潘故大
族夫黨數千百人賓接皆盡禮無裏外言志向沖淡服
玩不為紛華歲時簡嬉遊十年間惟一適西池而已再
生子不成而死媵妾得女拊視如已出政和三年改稱
柔惠帝姬五年薨年三十一追封賢靜長帝姬

哲宗四女鄧國揚國二公主早亡

陳國公主始封德康公主進瀛國榮國大觀四年下嫁

石端禮徙陳國改淑和帝姬政和七年薨

秦國康懿長公主帝第三女也始封康懿進嘉國慶國
政和二年改韓國公主出降潘正夫改淑慎帝姬靖康
末與賢德懿行大長公主俱以光朝女留於汴建炎初
復公主號改封吳國覲上於越以玉管筆小玉山奇畫
為獻上溫辭卻之避地至婺州紹興四年入見其子堯
卿等五人各進官一等主奏言祖宗以來駙馬都尉石
保古魏咸信柴宗慶皆除使相今正夫歷事四朝在汴

京曾建議迎陛下至杭州又言禁衛未集預宜防變乞除開府上不許八年再入見留宮中三日時極暑上每正衣冠對之飲食又為正夫求恩數上曰官爵豈可私與人況今日多事未暇及此時趙鼎當國方論羣臣紹述之奸頗抑正夫鼎去位正夫始得開府之命給事中劉一正言其非舊制恐援例者多乃詔哲宗惟正夫為近親餘人毋得援例顯仁太后歸主同秦魯國大長公主迎於道十九年又入朝子長卿粹卿端卿皆自團練

使陞觀察使從所請也孝宗即位進封秦國大長公主
隆興二年薨諡康懿主在日正夫官至少傅封和國公
溫卿寧國軍承宣使長卿寧江軍承宣使端卿昭信軍
承宣使清卿容州觀察使墨卿才卿並帶團練使其盛
如此正夫薨於紹興二十二年贈太傅

徽宗三十四女政和三年改公主號為帝姬國號易以
美名二字

嘉德帝姬建中靖國元年六月封德慶公主改封嘉福

尋改號帝姬再封嘉德下嫁左衛將軍曹黃

榮德帝姬初封永慶公主改封榮福尋改號帝姬再封
榮德下嫁左衛將軍曹晟

順淑帝姬初封順慶公主薨追諡益國及改帝姬號追
封順淑

安德帝姬初封淑慶公主改封安福尋改號帝姬再封
安德下嫁左衛將軍宋邦光

茂德帝姬初封延慶公主改封康福尋改號帝姬再封

茂德下嫁宣和殿待制蔡偉

壽淑帝姬初封壽慶公主薨追封豫國及改帝姬號追封壽淑

惠淑帝姬初封惠慶公主薨追封鄧國及改帝姬號追封惠淑

安淑帝姬初封安慶公主改封隆福薨追封蜀國及改帝姬號追封安淑

崇德帝姬初封和慶公主改封崇福尋改帝姬號下嫁

左衛將軍曹湜再封崇德宣和二年薨

康淑帝姬初封康慶公主改封承福薨追封商國及改
帝姬號追封康淑

崇淑帝姬初封崇慶公主改封懿福薨追封蔡國及改
帝姬號追封崇淑

保淑帝姬初封保慶公主薨追封魯國及改帝姬號追
封保淑

成德帝姬初封昌福公主改號帝姬再封成德下嫁向

子房

洵德帝姬初封衍國公主改號帝姬尋改封洵德下嫁
田石

悼穆帝姬初封徽福公主改號帝姬薨追封悼穆

顯德帝姬初封顯福公主改號帝姬尋改封顯德下嫁
劉文彥

熙淑帝姬初封熙福公主薨追封華國及改帝姬追封
熙淑

敦淑帝姬初封壽福公主薨追封涇國及改帝姬追封敦淑

順德帝姬初封順德公主改號帝姬尋改封順德下嫁向子辰

柔福帝姬初封柔福公主後改帝姬

申福帝姬初封薨追封沖慧

寧福帝姬政和四年封

保福帝姬追封莊懿

賢福帝姬追封沖懿

仁福帝姬追封順穆

和福帝姬

永福帝姬

惠福帝姬

令福帝姬

華福帝姬

慶福帝姬

儀福帝姬

純福帝姬

恭福帝姬

右三十四帝姬早亡者十四人餘皆北遷獨恭福
帝姬生纔周赧金人不知故不行建炎三年薨封
隋國公主安德帝姬有遺女一人後適嗣秀王伯
圭封秦國夫人榮德帝姬至燕京駙馬曹晟卒改
適習古國王紹興中有商人妻易氏者在劉超軍

中見內人言宮禁事遂自稱榮德帝姬鎮撫使解
潛送至行在遣內夫人驗之詐付大理寺獄成詔
杖死又有開封尼李靜善者內人言其貌似柔福
靜善即自稱柔福蘄州兵馬鈐轄韓世清送至行
在遣內侍馮益等驗視遂封福國長公主適永州
防禦使高世榮其後內人從顯仁太后歸言其妄
送法寺治之內侍李恡自北還又言柔福在五國
城適徐還而薨靜善遂伏誅柔福薨在紹興十一

年從梓宮來者以其骨至葬之追封和國長公主
孝宗二女長嘉國公主紹興二十四年封碩人進永嘉
郡主三十二年卒詔以醫官李師克等屬吏孝宗時居
東宮奏臣女幼而多疾不宜罪醫遂寢乾道三年贈嘉
國公主次女生五月而夭未及封

文安郡主光宗長女也次女封和政郡主季女封齊安
郡主皆早卒紹熙元年並追贈公主

安康郡主魏惠獻王女也初封永寧郡主改封通義以

父遺表遂升安康歸殿前司前軍統領羅忠信子良臣
詔王府主管鄧從義諭旨皇女孫郡主宜執婦道務成
肅雍之德毋敢或違賜甲第居之良臣以恩轉秉義郎
除閤門祇候官開禧元年郡主薨年三十九
祁國公主寧宗女也生六月而薨追封祁國

周漢國公主理宗女也母賈貴妃早薨帝無子公主生
而甚鍾愛初封瑞國公主改昇國開慶初公主年及笄
詔議選尚宰臣請用唐太宗下降士人故事欲以進士

第一人尚主遂取周震炎廷謝日公主適從屏內窺見意頗不懌帝微知之景定二年四月帝以楊太后擁立功乃選太后姪孫鎮尚主擢鎮右領軍衛將軍駙馬都尉進封公主為周國公主帝欲時時見之乃為主起第嘉會門飛樓閣道密邇宮苑帝常御小輦從宮人過公主第特賜董役官減三年磨勘工匠犒賞有差明年進封周漢國公主拜鎮慶遠軍承宣使鎮宗族娣姒皆推官加封寵異甚渥七月主病有鳥九首大如箕集主家

搗衣石上是夕薨年二十二無子帝哭之甚哀諡端孝
鎮官節度使云

宋史卷二百四十八


謹案卷二百四十六第四頁後八行初授山南東
道節度使刊本山南訛南山據職官志改

卷二百四十七第二十頁前七行省緡錢十五餘
萬按餘萬疑有訛

第二十一頁後三行改江西路轉運判官刊本江
訛四據監本改

第二十三頁前四行改昭信軍簽判奇之按奇上
當有一人姓名或上游職銜觀下句用亦字可

見



總校官庶吉士臣張能照

校對官庶吉士臣陳崇本

謄錄舉人臣勵守訓

謄錄監生臣胡先鳴